



Aqqalu C. Jerimiassen
Atassut

UKA 2021/71
04. November 2021

Inatsisartunut aalajangiiffigisassatut siunnersuut Naalakkersuisut peqquneqassasut siunnersuuteqaqqullugit isertitanut akileraarutip inatsisartut inatsisaata allangortinneqarnissaanik, ingerlatsiviit tamakkiisumik ilaannakumilluunniit akileraarutai 20%-imik appartinneqassammata 1. januar 2023-imiit.

(Inatsisartunut ilaasortaq Jens-Frederik Nielsen, Demokraatit)

Sulineq imminut akilersinnaanerusoq tamatta ujartungaraarput, assignanissaarlu aningaasap pisissutigineqarsinnaanerata qaffasinnerpaaffissaminiinnissaa kissaatiginerpaasuaannarlutigu.

Kinaluunniimmi innuttaasoq kaasarfini imaqarneruppata nuannaarnerusinnaasoq takorloorneqarsinnaavoq.

Nunamili maanna inuuvugut akitsuuteqareersut qaavatigut suli akitsuutinik assigiinngitsunik qalleqqeqattaarlugit, lagkage ataaseq aggoqattaarusaarlugu aningaasap puseqattaarusaarnerani qanoq agguaannissaanik siuneqartartuarluta.

Akileraartarnikkut maanna inissisimaneq tamaat ataatsimut isigissagaanni, naak pisariikannersinnaangaluarluni “ittannerungaanni” atornerlussallugu ajornanngitsuaraarakasiuvoq. Tassami suliffeqarfittut aaqqissuussinermi suliffeqarfiup ataani assigiinngitsunik suliffeqarfeeqqanik allanik A/S-inik ApS-inilluunniit pilersitseqattaartoqarsinnaavoq, akileraarutissaq sipaarniarlugu.

Taannaavorlu ilaatigut suliffeqarfiit annerumaat atorluartaqisaat, suliffeqarfimi iluani aningaasat kaavisipallaannarlugit, oqartoqartarnerattuut “errorlorlugit” akileraarutissap minnerpaaffissaaniinnissaa anguniarlugu. Assignanittaarlu akiliisinnaajunnaartitsisuusaartarnek imaaliillaannarlugu anguneqarsinnaalluni.

Tamannalu pillugu Atassummi, uunga isumamut assortuinngikkaluarluta akileraartarnikkut tamakkiisumik nutarterilluinnartoqartariaqarnera pisariaqarsoraarput. Suliffeqarfimummi akileraarut apparsassagaanni, malittaani inuttut isertitanut akileraarutittaaq apparsarneqarnissaa malinnaasariaqarmat.

Suliffeqarfimum akileraarutip apparsarnissaa ukiumiik ukiumut ingerlasinnaanissaa Atassummiit kissaatigineruarput, ingerlaannaq 5%-imik appartinngikkaluarlugu, assersuutitut; ukiut tallimat iluanni 1%-ikkarlugu appartarneratigut 5%-imut killitsinneqarsinnaavoq.

Malittaani inummut akileraarutip malinnaasumittaaq apparsarneqarnissaa.

Tamarmilli tamakku akeqarmata, Atassummiit imannak siunnersuuteqarusuppugut. Inummut akileraarutip apparsarnerata malittaani inummut ilanngaattaaq apparsarneqassaaq, tassa imaappoq



inummut akileraarut sapinngisamik ataasiinnanngorsarneqartariaqarpoq akileraarutit sippuutaanik utertoorujussuarterneq pinaversaartinniarlugu.

Malitsigissuaa, ukiumut annikittuinnarmik sulisartut akileraarutit sippuutaanik utertoorsinnaanissartik eqqanaarniaannarlugu piujunnaavinnissaat.

Tulliatut malitsissaa takorloorneqarsinnaasooq tassaavoq, isertitakinnerpaajunermeik akunnattumik isertitaqartunngornissamut ikaarsaarnissaq orniginarnerulissooq, nalunngikkaannimi kaasarfimmioq sulilluarnerungaanni annerulissasooq sooq uninngaannartoqassammat?

Maannakkut akileraartariaasitta ajoraluartumik annertuumik pisareqqavaatigut, isertitakinnerpaaffimmi eqqarnaarneqarsinnaajuaannarpoq inummut ilanngaatit nungussimannikkaanni akileraartugisimasat tamapajaamik utertoortugineqarnissaat. Soorunamiuna kajuminnanngilli isertitakittuunermeik akunnattumik isertitaqartuunermut ikaarsaarnissamut.

Taamatuutaaq ippoq, suliffeqarfiit eqqarsaatigissagaanni, inuup ataatsip suliffeqarfiutai soqutigisaqatigiiffiillu (I/S), ilanngullutik oqilisaassiffigineqassappata suliffeqarfinnut akileraarutit appartinnissaa kisiat ukkattariaqanngilaq, siuliimi suliffeqarfeeqqat taakkartukkakka piginnittui nammineerluni nalunaarsuiffissat atorlugit sulii ingerlasarmata, imaalluni; inuttut isertitat akileraarutaanik akileraartarlutik.

Akileraartarnikkut apparsaanissamut taamaammat siammasissumik eqqarsartariaqarpugut.

Aningaasap pisissutigineqarsinnaanerata qaffasinnerpaamiilernissaa angusariaqarparput aningaasarsianik qaffaanerit aqqusaartorpallaanngikkaluarlugit.

Uani akuuvoq, suliffeqarfinnut akileraarutit apparsarnissaani inummut akileraarutit malittaanic apparsarnissaa, inummullu ilanngaatit malittaannittaag apparsarnissaa inummut akileraarutit apparsarneranut malinnittumik. Erseqqissarluguli, ilanngaatigineqarsinnaasut allat mattunnissaanic oqariartuuteqannginnama, sulii allat ilanngaatigineqarsinnaasut ingerlajuartariaqarmata akunnattumik isertitaqartut illusisinnaallutillu akisuunik pisisinnaaniassappata.

Tamannalu pillugu siunnersuut kivisiinnarusunngilarput, allannguutissamilli siunnersuuteqarusulluta imannak:

“Naalakkersuisut peqquneqassasut, 2023-imiik ukiut tallimat ingerlaneranni suliffeqarfinnut akileraarutit ukiumut 1%-ikkaarlugu appartinneqartarnissaanic suliaqassasut. Taamatuttaarlu inummut akileraarutit malinnittumik apparsarneqarnissaanic inummut ilanngaatit malinnaasumik apparsarneqarneratigu aningaasalersorneqartumik, taamaalilluni ukiut tallimat iluanni inummut akileraarutit suliffeqarfinnut akileraarutit appariartortinneqarneratuttaaqq appariartoqataasumik malinnaasussamik inatsisartut aalajangiiffigisassaasut siunnersuut”.